

## **JUAN DI ORO**

Pa efektuaá pago di suma grandi tabata usa prinsipalmente peça portugues, mihó konosí komo Juan di Oro, trahá na Brasil. E nòmber Juan di Oro ta bini di Rei Juan (1706 – 1750) di Portugal, kende a introdusié na 1722.

**For di 1785 e moneda di oro portugues akí tabata un moneda komersial importante na Kòrsou. Na momento di su introdukshon e tabatin un balor di 90 real, ku na papiamentu a duna e nòmber di riá.**

Manera tabata e kaso ku mayoria di moneda, tabata imitá Juan di Oro tambe na gran eskala. E imitashonnan akí tabata kontené ménos oro. P'esei gobièrnu a disidí di manda pone un marka riba e mihó ehemplarnan. E platé lokal Godhelp Israël Hoyer a hasi e trabou di pone e stèmpel o “reseyo” na e monedanan. Komo marka di kalidat el a usa su propio inisialnan “GIH”.

Te 1826 Juan di Oro i su imitashonnan a keda bálido na Kòrsou.

## YOTIN KÒRTÁ

For di momento ku spañónan a deskubrí Kòrsou na 1499 te ku fin di siglo XVIII, tabata usa prinsipalmente moneda spañó kolonial.

Na final di siglo XVIII flosementu di komèrsio na Kòrsou a stanka. Debí ku tabatin mas importashon ku eksportashon, pronto a surgi eskases di moneda.

E ora ei, na 1799 Gobernador Johan Lauffer a disidí di manda kòrta 8.000 peso di plata spañó (8 real) na kuater i duna kada kuarta parti un balor di 3 real.

E monedanan nobo akí, debí na nan supuesto método di produkshon, a haña e nòmber “guillotine”, yamá asina debí na e mésun nòmber di e aparato ku burdugunan di Revolushon franses tabata usa. Na papiamentu “guillotine” a para bira “Yotin” Kòrtá.

## UN SERI DI MONEDA SPESIAL PA ANTIANAN HULANDES.

Durante Segunda Guera Mundial gobièrnu hulandes a introdusí un sistema monetario spesial pa **Curaçao**. Komo Hulanda tabata okupá, a manda traha e monedanan na Denver, Merka.

Despues di liberashon di Hulanda na 1945, Kas di Moneda na Utrecht a keda enkargá ku trahamentu di moneda di Antianan Hulandes. Ounke na Hulanda a opta pa un seri di moneda kompletamente nobo, na Antianan Hulandes a sigui usa e monedanan di promé ku Segunda Guera Mundial.

Na final di añanan sesenta debí na oumento di preis di plata a resultá nesesario revisá e seri di moneda. Komo tèst a produsí un seri nobo di moneda na 1969, ku un edishon di solamente 200 moneda. Un año despues a kuminsá ku produkshon definitivo di mayor kantidat. E monedanan no solamente a haña diseño nobo, sino ku a traha nan tambe di otro material. **A remplasá plata pa nikel i, na 1979, a remplasá bròns pa aluminio.**

Na 1986 Aruba a haña su “status aparte” i moneda propio. Esei a hasi nesesario revisá e seri di moneda di e sobrá sinku islanan di Antianan Hulandes. Na e okashon ei a kambia mas ku solamente e eskudo di e monedanan.

Kas di Moneda na Utrecht a desaroyá un seri kompletamente nobo di moneda, basá riba diseño di e stùiver firkant di 1913: **un taki di laraha ku fruta n’e**. Den e seri nobo e moneda di dos sèn i mei no a bolbe i a traha e moneda di 5 sèn o stùiver na forma rondó. Pa e moneda nobo di 50 sèn ku a introdusí, a reservá e forma firkant ku ta asina karakterístiko pa moneda di Antianan Hulandes. E monedanan di mayor balor ta trahá di un material koló di oro.

## **MONEDANAN KONMEMORATIVO**

For di 1973 gobièrnu di Antianan Hulandes ta emití monedanan konmemorativo na okashon di susesonan spesial.

Semper bai, na momento di nan emishon, e monedanan akí tin estado di medio di pago legal, pero pa motibu ku hopi biaha nan balor ta mas haltu ku e balor nominal, generalmente no ta topa nan den sirkulashon normal di plaka.

**Diseño spesial di e monedanan, e atenshon spesial ku ta dediká na kalidat di e monedanan akí ora ta produsí nan i nan edishon limitá, ta hasi e monedanan akí berdadero ophetonan pa kolekshonista.**

## **MEDIONAN DI PAGO 1821 - 1880**

Promé biaha ku a traha moneda spesial pa Kòrsou tabata na 1821. Na un fábrika te ainda deskonosí na Merka a traha moneda ku un balor di 1 real riba enkargo di Gobernador di Kòrsou. Un año despues a sigui e enkargo pa traha stùiver. Riba e monedanan akí a aparesé pa promé biaha e nòmber “Curaçao”.

Na 1826 a stipulá mediante Lei ku mester usa na Kòrsou tambe monedanan bálido na Hulanda. Sin embargo, vários moneda ekstranhero a sigui den sirkulashon na Kòrsou.

E kantidat di moneda hulandes ku tabata manda Kòrsou a sigui ta insuficiente. Kòrtamentu di moneda na kuater e tempu ei entre tantu tabata asina generalmente konosí, ku na 1838 a bolbe disidí di hasi esei. E or’ei a usa florin hulandes ku kabes di Rey Willem I na lugá di moneda spañó. Tabata kòrta un florin na kuater parti.

Kòrtamentu di moneda sin embargo no a trese solushon pa e eskases di plaka largá. P’esei, na 1875 tres kas komersial partikular na Kòrsou mes, Naar, Jesurun i Leyba a laga traha stùiver.

Riba e stùivernan di Leyba tabatin e lèternan L&Co. Riba e stùivernan di Naar tabatin e lèternan J.J.N., miéntras Jesurun a laga pone J&Co riba e stùivernan. Aparentemente djis un par di año despues a saka e stùivernan akí for di sirkulashon.

**Tòg ainda a traha na 1900 i 1901 dos moneda spesial pa KOLONIA KÒRSOU: unu di dies plaka ( 1/4 florin) i unu di depchi ( 1/10 florin).  
E dos monedanan akí no tabata bálido na Hulanda.**

## SISTEMA MONETARIO HULANDES

Na komienso di siglo XIX sistema monetario na Kòrsou tabata un káos enorme. Konstantemente tabatin eskases di moneda i tabata usa gran kantidat di moneda estranhero den komèrsio. Kòrtamentu di Pilaardollar, supreshon di Juan di Oro i introdukshon monedanan nobo no a trese e solushon deseá. Hulanda a intervení. Dia 31 di òktober 1826 a implementá e Lei monetario di Kòrsou. E Lei tabata stipulá ku entrante promé di yanüari 1827 mester a usa na Antianan Hulandes, e monedanan ku tabata usa na Hulanda. A pèmití apénas algun moneda kurasoleño den sirkulashon: moneda di 3 real (ku balor di **Nfl 0,50**) i e stùiver di Kòrsou (**Nfl 0,025**). A saka sobrá realnan di sirkulashon i a manda nan Hulanda kaminda a dirti nan.

Pa komèrsio ku eksterior a mantené Pilaardollar di plata i algun moneda di oro. Desafortunadamente, introdukshon di un sistema monetario nobo tampoko no a trese kambio den e sistema monetario kaótiko di e kolonia. E ora ei, Rei Willem I a pone su speransa riba fundashon di un banko di estado, prekursor di e aktual Banko Sentral di Antianan Hulandes.